

福安縣志第六卷

名賢志

名宦

宋鄭黼字文甫崇安人淳祐五年任知縣時縣始置綿
蕞為治黼經畫邑居設施政令井井有條民不知勞
去任邑人送之無不垂涕

○詹棨字德寬崇安人嘉熙中進士為縣尉有婦陳氏
死非命棨覆驗見其腹脹得竹刃於隱僻間賊亦隨
獲遷瑞州法曹

○林子勲字翼之婺州永康人淳祐八年知縣時縣治

卷之六

一

經畫已定而公署未建子勲踵成之居官以廉謹名
元忙兀歹回回人皇慶中知縣以廉潔正大律身以孝
弟忠信導民敬老愛士務農重穀民立善政碑

○高琛燕山人至順初知縣剛毅正直表孝弟以勵風
俗興學校以敦教化鋤強植善厚本抑末秩滿去民
立去思碑

○胡璉懷孟人至大間任邑簿持身廉謹以德化民遷
建廟學創薛補闕祠造溪口諸橋民懷之

○林天賜至正五年知縣值大饑民負米為丘寧十等
所奪恣行劫掠口瓜果不能畱天賜至詢民疾苦置

酒醉寧十等伏兵誅之百姓感悅

朝本

黃理字子溫歙人永樂初知縣禮士愛民政平訟簡有公勤之譽

○鄭齋江山人永樂中知縣興學校均徭役恤鰥寡而濟以廉勤

○胡晨字克興直隸人正統末丞時鄧茂七倡亂愚民乘機嘯聚掠縣境晨備禦有方民賴以安景泰初大飢倉廩匱竭晨立券稱貸於富家不足乃盡借畱倉米賑之同官欲候申請晨曰請則動經旬日民死過半矣有罪晨獨當之遂開倉賑給全活者衆

卷之六

二

○趙璉字宗商成化五年丞時大風傷稼繼以水患民大饑璉不待請以倉儲餘糧量口給食又勸富民出穀以濟不足民賴全活者衆童謠曰有桑足我蚕有田足我農衣食誰與我縣丞趙相公

○馬時中字希德潮陽人成化中任知縣仁民愛物政尚簡要勸農桑興學校治有成績

○王昞字明卿山陰人弘治間知縣愛民禮士正風俗釐弊政新公署民不知勞

○李希賢字士甫華亭人弘治間任訓導心地寬平學問醇正教人循循善誘恩義兼盡在任八年猶一日

卒於官

○劉曇字汝霖浮梁人正德初任訓導端重嚴績善屬文多士愛而敬之

○沈愚字子明吳江人正德門任知縣愛民好士未朞月而卒士民追慕之

○于震字孔安餘姚人舉人正德間任知縣簡默公勤抑強扶弱重建鼓樓以壯縣治慎軍儲剗奸弊民多懷之政暇手不釋卷尤長於詩著有易傳東溪集後以狷介去士論惜之

○楊槃字世資崇仁人正德間任教諭謹身嚴教處事不苟人不敢干以私非公事不至公堂當道雅重之疾卒多士哀之

卷之六

三

三百一十

○劉疇字德成安仁人正德間知縣氣量寬洪平易簡默視民如子待士若賓譖愬不行為政三年未嘗有怒色及去士民不忍舍

○歐陽復字子陽融縣人正德間任主簿持身清慎臨事公勤敬禮士夫民有爭訟則慰諭之皆俛首而退在任三年卒人甚悼之

○覃廷珍字君重高要人正德間任典史謹厚謙勤敬士恤民巡歷鄉都不苟取以艱去民德而懷之

○韓洲字汝清蕭山人正德十六年任知縣持身剛介蒞事公勤興學恤民九年一致既歸人思慕之

○陳泗永康人監生嘉靖間知縣摘奸鋤強每食只薯一豆人呼薯公其清介如此

○袁埴字邦器豐城人舉人嘉靖間任教諭持身不苟立教嚴切按月率諸生習冠婚射禮督學者甚嘉之在任三年口不言利以艱去士不忍舍

○繆冕字希周汾水人嘉靖七年訓導朴素自持取與不苟以道學自勵撰師聖賢克己私戒嗜慾務謙勤四詩梓以授諸生且曰某無以為教願諸君體之督

卷之六

四

三百六十

學責以舉惡冕曰古人謂平原自無冕不敢罔人以自免竟受罰士論賢之陞江西星子教諭未赴卒士哀悼之

○程箕直隸績溪人嘉靖三十七年教諭博學多文立法嚴條學政一新三十八年倭入寇箕守西門督兵力戰遂遇害城上事聞當道移檄褒嘉令有司以禮斂葬

○謝君錫廣東海陽人嘉靖三十五年訓導性謹量寬接人以和不妄言笑不苟取予士皆愛而敬之三十八年倭寇至君錫守小西門率兵拒敵二日流矢貫

面猶強忍不退少頃賊陷北城兵潰遂回儒學着公服觸死文廟事聞當道移檄嘉褒有輸忠全節之語

○盧仲佃字汝田號懷莘東陽人進士三十八年自晉江調福安時縣城初陷積骸彌野廬至興嗟墮淚慨然與民更始題曰重開新日月再集舊人民九事求便民改築城壕民賴以蘇明年倭又薄城携三子以守民有固志賊不得犯是甦生而安全之也四十年擢刑曹去民立生祠祀焉

○李長見寓官

鄉賢

此條舊闕但於人物志中考之今摘其名與名宦對

卷之六

五

唐薛令之

見人物

宋楊復

王定國

張泳

鄭虎臣

謝翱

並見人物

朝本陳錡

陳琦黃釧

郭文周

繆一鳳

並見人物

寓官

宋韓世忠討建寇范汝為屯兵雙巖嶺

○王十朋知福州久寓雙巖有題詠

朝本尚書何喬新號椒丘謚文肅成化年任建寧道按縣

勘水灾民有貧不聊生者欠糧不能納里正督之且索私債民急欲自縊里正執以詣道何公訊而憐之笞里正使代納俟秋成取償焉民泣謝更生有救荒

詩見文翰志

○李長字復之浙江縉雲人進士授戶科給事中正德十四年以言謫本州判官蒞政廉明署本縣事一年旌孝子抑浮屠民有訟聽其教者咸願退釋當時有活神明之稱祀名宦

○顏容端廣東長樂人進士嘉靖七年以南安令來攝縣事政平民安人至今頌之

○陳松建陽丞署本縣事公廉自持嘗曰我只飲福安一口水耳及擢知縣行囊篋蕭然

○梁鵬廣東順德人進士以刑部主事謫福建塩運司知事萬曆九年水後來攝縣政廉介真率捐貲以助諸生之無冠服者貧婦夜作給以油燭每飯席無兼味坊里有私餽者戒而遣之吏皂非差喚不敢離班

寓賢

宋朱松字喬年號韋齋同子熹寓縣北龜齡寺今有祀祠

○陳傅良寓二十五都周大山有紀詠鐫石

縣志六卷終